



SchlössliTimes

Ussgob 26

Februar 2018

Jubifasnacht - 20 Johr...

In dere Ussgob:

Heimspiil 11.11.2017	2
Chesslätä Morschach / Schlössli-Termin	3
Blaggedde-Ussgob	4
Programm Aescher Fasnacht	5
Guggilari Olte	6
Schlössli-Poesi	7
9mo entweder oder...	8


... ischs här, do het sich e Grüppli dra gschickt, e Guggemuusig z'gründe. Und das Ereignis fiire mr an dr dasjöhriige Fasnacht. D'Kostüm sind verteilt, d'Zoggeli erstrahle in vollem Glanz und d'Larve warte uf ihre Isatz. Es goht nümmi lang, denn träffe mr uns mit allne andere Aescher Fasnachtsfründe uferm Schueli Neumatt.

Bis jetzt hämmer e super Vorfasnacht gha und s'Fasnachtsfieber stigt meh und meh. Jetzt müemmer nur no alli schön brav unserei Teller usässe, damit mir denn wunderprächtigs Fasnachtswätter dörfe gniesse ;-) Es wär allne Fasnächtler z'wünsche.... Die letschte zwei Johr sind jo nid nur guet gsi in däm Punkt. Näbem Sunntig (mir wärde meh wie au scho sie während em Umzug) wird au dr Mäntig Obe speziell Sie für uns. Mir dörfe dr Obestreich eifach nur gniesse. D'Instrumänt bliibe fascht dr ganz Obe verstaute, und mir empfangen die andere Fasnächtler bi uns zum einte oder andere Bier. Chömmed verbi, denn cha me chli in vergangene Zeit schwelge und e schöne Fasnachtsobe zämme gniesse.

Immer ufem laufende uf:
www.schloessli-schraenzer.ch

Eure
Matti-Babbe-Fischi





Heimspiel 2017

Wie in de letschte paar Joor, het au dasjoor unsers alljöhliche Heimspiel statt gfunde. Pünktlich zum Fasnachtsbeginn am 11.11.2017 simmer wider in dr Löhrenackerhalle gstande. S' Line Up für dasjoor, isch bsunders hochkarätig gsi. Näbe de Nuggi-Spugger, de Steibruchschränzer, de Trottwarschlurbi und de Bööge Brätscher, hämmer au d'Schotte Clique us Basel dörfe begrüesse.

Aber fömmer ganz am Afang ah. Scho am Fritigmorge sin villi vo de Schlösslis in de Halle gstande und hän gholfe de Teppich ihnetrage, usrolle und zämmekläbe. Wie jedes Joor brucht das eigentlich am meischte Zyyt. Sobald de Teppich aber mol stoht, bzw. ligt, gohts denn zimlich flott – emel bi de meischte unter uns ;P. Aber glich bruchts halt viel Zyt und Arbeitskräft zum die Halle guffeschtauglich zmache. Und dorum simmer de ganz Fritig am ufbaue gsi.

Mir hän uns dasjoor für e neu Ufteilig vo de Bar entschiide. De Gedanke isch gsi, dass es mehr Platz vor dr Bühni fürs Publikum ha sött. Und das isch uns glaub au zimlich guet glunge und es isch bi de Lüt guet acho. Glichzytig hän mer dasmol e grüeni Bar gha. Sprich es het alles grüeni Getränk gäh, wie z.B. grüens Bier, Fröschli, grüne Vodka usw. Unseri Fründe vo de Bärefels hän die Bar für uns gschmisse ☺. Au wenn mer no mit Fäldschlössli hän müesse kämpfe, will sie uns blau – anstatt grüeni Bierharrasse (für unseri grüeni (!!!!) Bar) gliiferet hän. Das isch denn natürlich gar nit gange – aber unsers OK het au die Hürde bravurös gmeischeret ☺. Nachdem mer denn am Fritig obe no alli zämme Znacht gässe hän, hän mer uns denn am Samstag Nomitag füre Fiinschliff, und denn zobe füre Sponsore-Apéro troffe.

Und denn isch es scho bald los gange. Nachdem d'Türe vom Heimspiel uf gange sind, isches nit lang gange, und d'Halle isch guet gfüllt gsi. Scho die erschi Gugge, d'Steibruchschränzer us Würelinge hän vor viel Publikum chöne spiele, was uns natürlich sehr gfreut het. D'Stimmig isch sehr guet gsi und es isch wie jedes Joor ordentlich flüssigs und feschts konsumiert worde ☺. Um Mitternacht isch es denn sowit gsi und mir hän unsere Uttritt gha. Es isch scho jedesmol super, am Heimspiel dörfe uf dr Bühni zstoh und vor so viel Publikum zspiele.

Nachdem mer denn ca. um die 2, halb 3 ume au de letschi us dr Halle gworfe händ und au no die letschte tanzende Schlössli vo de Bar und de Tisch hän chöne abekriege, ischs denn ans Ufruume gange. Au dasjoor ischs wider e müehsami Sach gsi, nach so viel Stunde „schaffe“, denn au no die ganz Halle müesse ufzruume. Wenns denn aber mol lauft und alli mit apacke, isch d'Halle bis am 6i, halb 7bni am morge blitzblank ufgruomt. Und als Lohn gits denn – zumindescht für e paar vo de Schlösslis – s'wohlverdiente Nochspiel im Pub vorne (oder s'Bett dehei ☺).

Celinsche



Chesslätä 18.09.2017, Morschach SZ

Wie jedes Johr hämmers uns churz nachem Heimspiil verdient, s'erschte mol on Tour z'goh. Natürlich in Kostüm und Larve! Unseri erschti Carfahrt het uns in die schöni Innerschwyz gführt, an d'Chessletä nach Morschach. Wie jedes Johr isch dr erschti Ussflug immer speziell. Nachem stränge Heimspiil-Weekend isch d'Vorfreud riesig ,und gniesse isch agseit gsi. Passend zu däm Motto händ sich e Teil vo de Schlösslis scho chli früehner ufe Aperö im Pub troffe. Am früehe Obe händ sich denn Alli wie gwohnt bi uns im Probelokal igfunde, und scho gli simmer denn au los richtig Innerschwyz. D'Stimmig im Car isch locker gsi, au wenn unseri Partybox nid uffglade gsi isch. S'git jo gnueng anderi Gadgets wo me cha Musig drüber laufe loh. Und so simmer scho voll in Stimmig, mit gueter Party-luune am Zielort acho.

S'Fescht het in dr örtliche Turnhalle und im Kaffizält vor dr Halle stattgfunde. In dr Halle händ die verschiedene Guggene und dr DJ für stimmig gsorgt. Im Zält usse hets urchigi Musig und Schlager gäh, so das me d'Stimmig dobe ghalte het ;-). Mir händ relativ viel Zit gha zum uns vorem spohte Ufftritt in Stimmig z'bringe. Wär uns kennt, weis au das mr die lang Vorlaufzit guet gnützt händ... jede het nomol s'Programm vorem geischtige Aug duregspiilt.... oder so ;-). Mir sind so parat gsi, dass dr Michel bim Instrumänte uslade plötzlich hektisch het afo „Wasser-Shots“ verteile... heeeeeeeee, wo isch dr Feigling???

Total erfrüschet hämmer unsere Ufftritt voll guet über d'Bühni brocht und für super Stimmig in dr Halle gsorgt und viel Spass gha debi! Gli simmer au scho fertig gsi und denn hämmer schnäll d'Instrumänt und d'Larve wieder im Ahänger versorgt und händ uns wieder unter d'Lüt gmischt, vorzugswiis im Kaffizält usse, und no e gueti Zit bis zur Rückfahrt zämme gnosse. Dr Feigling hets denn übrigens au no gäh... glaub s'erschte Mol nachem Ufftritt D'Saison isch jetzt so richtig lanciert!

Matti-Babbe-Fischi

Schlössli-Schränzer Termine

02.-04 Februar	Schwäbisch Gmünd / DE
08. Februar	StädtlifägAIR / Klingnau AG
10. Februar	Wagetaufi Bärefels / Rynach
11.-13. Februar	Fasnacht Aesch
18. Februar	Fasnachtsfüür
20. Februar	Fasnacht Basel
04. März	Jubiläums-Bummel
07. März	Ussprochsitzig
13. April	GV

Blaggedde-Usgoob 06.01.2018

Am Dreikönigs-Tag het die diesjööri Blaggedde-Usgoob in Aesch stattgfunde. Wie allewyl sind mir am viertel ab 5i vom Restaurant Tipo zum Gmeindplatz marschiert. Dört ako hän sich die 4 Guggemuusige vereint und zämme diversi Lieder gspielt.

Bis zum Uftritt vom Räbgäischt und dr Präsentation vo de 2018er Aescher-Blaggedde het me sich im Zält uf-gwärmt, öppis trunke und alti Bekanntschafte troffe.

Nachdäm dr Matthias Cueni, Obmaa vom Aescher-Fasnachtscomitee, die awäsende begriesst het, isch dr gross Uftritt vom Räbgäischt uf em Programm gstande.

Bringt dr April no Schnee und Froscht
Gitts wenig Wy und suure Moscht
Drum seit Oberräbburr churz und knapp
S hett dr Wättergott e egge ab

Das sind scho erschti Hiwiis zum diesjörige Sujet gsi. Nachdäm d Blaggedde-Künstler dr Ric und d Angela (nit unseri Majöse!!) d Blaggedde enthüllt hän, isch es au ganz klar gsi und s Sujet 2018 heisst „Räbe Fruscht“. Dr kalti April 2017 het in Aesch über 90% vo de Trube zerstört und het bi de Wybuure entsprächend für Fruscht gsorgt.

Zwüsche em halb 8i und em halb 11i hän diversi Gugge gspielt und dr DJ Hausi het mit sim Laptop für Party gsorgt. Mir hän wieder emol als letschti Gugge dörfe spiele. Entsprächend sind e paar au scho guet parat gsi, aber das sind bi uns sogar sehr gueti Vorussetzige und mir hän e solide Uftritt anelegt. D Party isch abschlies-send uf em Gmeindplatz no bis am 2i witter gange. Für di wo nit gnueg ka händ het no d Schöpfli-Bar offe ka oder me het sich wie allewyl im Pub no e Schlummer-Trunk gönnt.

D Aescher Blaggedde kriegt me bi jedem Aktiv-Mitglieder oder im Librodrom in Aesch.

Baumi



Aescher Fasnacht 11.02. bis 13.02.2018

Das Jahr hämmer jo, wie Ihr sicher alli wüessed, e spezielli Fasnacht. Nämmlisch 20 Jahr Schlössli-Schränzer! Natürlich wird die Jubifasnacht entsprächend gfiirt, sig das mit eme speziell tolle Kostüm, oder das mir die ehemalige Mitglieder iglade händ, dr Sunntig mit uns zämme z'vebringe. Sigs spielend bi uns in dr Reihe o-der als Vortrab!

Au dr Obestreich lauft nid wie gwohnt. Mir sind nämlich e offizielle „Poschte“ am Obestraich, wo d'Schnitzel-bängg und d' Guggemusige verbi chömme um für Unterhaltig z'sorge. Chömmed alli verbi, in unser Jubizält vor em Restaurant Mühli, unde an dr Hauptstroos vor dr grosse Stäge. S' git au gnueg zum Zämme uff d'Schlössli-Schränzer azstosse.



Fasnachtsumzug am Sunntig 11.02.2018

Pünktlich am zwei am Nomidaag gohts los. Mir händ passend zum Jubiläum d'Startnummere 20. Wie gwohnt laufe mr diräkt hinter unsere Fründe, de Bärefelswaggis :-)

Oobesträich 2018

12.2.2018 | Mäntig | 19.00 Uhr

Zeit Restaurant	19.00	19.30	20.00	20.30	21.00	21.30	22.00	22.30	23.00	23.30	24.00	24.30
Frohsinn			X	Chetteschlich	Wöschwyb	Schnupf	Doppelstäab	Spätzli	X			
Mühle			Spätzli	Revoluzzer	Chetteschlich	Wöschwyb	Schnupf	Doppelstäab	X			
Kluserstübli			Wöschwyb	Spätzli	X	Chetteschlich	Pfluumepfupfer	Schnupf	Doppelstäab			
Sonne			Schnupf	Wöschwyb	Spätzli	Doppelstäab	Chetteschlich	Wöschwyb	X			
Jura-Saal	Birspfupfer	Wöschwyb	Doppelstäab	Schnupf	Claraschnooge	Rumpelsuri	Schnappsbagge	Pfluumepfupfer	Chetteschlich	Revoluzzer	Spätzli	Birspfupfer
TAB			s'Rollaator Rössli	Doppelstäab	Schnupf	Nuggi-Spugger	Spätzli	Chetteschlich	Wöschwyb			
Apéro Schlössli			Chetteschlich	Pfluumepfupfer	Doppelstäab	Spätzli	Wöschwyb	Revoluzzer	Schnupf			
Tipo												
Jackson												

Fasnacht Aesch

SCHLUUCHETE

Spielzeit	Bühne Jackson	Bühne Spicy	Bühne Mühle
19:00 – 19:15	Graffiti-Spukker	Revoluzzer	Ruinenarre
19:25 – 19:40	Schlössli-Schränzer	Furzgugge	Pfluumä-Pfupfer
19:50 – 20:05	Birspfupfer	Seifesüder	Glori-Moore
20:15 – 20:30	Xmen-Group	Horburgschlurbi	Revoluzzer
20:40 – 20:55	Ruinenarre	Graffiti-Spukker	Node-Chaode
21:05 – 21:20	Grossschadchnulleri	Pfluumä-Pfupfer	LRG 13
21:30 – 21:45	Furzgugge	Schlössli-Schränzer	Birspfupfer
21:55 – 22:10	Glori-Moore	LRG13	Graffiti-Spukker
22:20 – 22:35	Horburgschlurbi	Node-Chaode	Xmen-Group
22:45 – 23:00	Seifesüder	Grossschadchnulleri	Furzgugge
23:10 – 23:25	Revoluzzer	Birspfupfer	Schlössli-Schränzer
23:35 – 23:50	Pfluumä-Pfupfer	Glori-Moore	Horburgschlurbi
00:00 – 00:15	LRG13	Ruinenarre	Grossschadchnulleri
00:25 – 00:40	Node-Chaode	Xmen-Group	Seifesüder

13.02.2018

WWW.FASNACHT-AESCH.CH



Guggilari – Olte, 13.01.2018

Es sind glaub scho öbbe 10 Jahr här, sit mr bi dr Guggizunft in Olte gsi sind. Jetzt ischs also wieder sowit gsi, und mir sind uf Olte ans Guggilari. D'Carfahrt isch für eimol nid eso lang gsi, aber nid minder luschtig. Car fahre chönne mr halt.... und die doofi Partybox isch wieder nid glade gsi... hängt do ächt e Fluech über de Reise vo de Schlössli-Schränzer ?!?!? Egal, Musig hämmer au dasmol ahnebecho und d'Fahrt isch im Nu verbi gsi. Alli usem Car usstiege, Itritts-Bändeli und Konsumationsbon gfasst, und ab ins Getümmel. D' Halle isch wie e Winter-Skiort dekoriert gsi. Und zum Spass vo de meischte Awäsende hets e Fotiegge gha, wo me sich mit Startnummere, Ski-/und Snwoboardusrüchtig het chönne bestücke und denn sehr glungeni Föteli mache. Mir hän uns natürlich so zimli als erschts in Pose gworfe ;-)

D'Guggene händ abwäggligswiis in dr Halle und im „Raucher“zält gpiilt. D'Fasnacht chunnt mit grosser Schritt nöcher, und entsprechend händ alli Guggen guete Sound und volle Isatz abgelieferet. Mir sind verhältnismässig ehnder früeh dra gsi und sind scho am viertelabelfi uff d'Bühni. Mir händ zum erschtemol s'Nickelback und dr neu Konzärtbeat vor Publikum usprobiert. Und me cha säge, es het glaub funktioniert.

An däm Obe hämmer au e spezial Guest dörfe begrüesse, respektive zugg begrüesse. D' Rahel isch chum zugg vo dr Wältreis grad wieder ins Kostüm gschlüpft und nach Monate ohni üebe grad wieder voll debi gsi und in d'Reihe gstande ☺ Es zieht eim ebe immer wieder sofort zugg zu uns. Nachem Ufftritt hämmer no gnueng zit gha zum de Fasnachtskläng z'horche, z'pläuderle, z'ässe, z'lache und eifach e glungene Obe zämme z'verbringe. Das hämmer au gmacht. Me merkt langsam das d'Fasnacht nüm sowit ewäg isch wie au scho, und d'Vorfreud vo Alass zu Alsass stigt. Schliesslich wartet au d'Jubifasnacht uf uns.

Jetzt wartet e guggefreis Weekend uff alli Mitglieder, bevors denn so richtig los goht mit eme Doppelufftritt und denn em Weekend in Schwäbisch Gmünd, wo mr scho zum dritte mol wärde teilnäh, e Wuche vo dr Fasnacht.

Cheers

Matti-Babbe-Fischi



Schlössli-Poesie

**20 Jahr ischs här, und zwar fascht genau
Do hän paar dänkt, wämmer und sölle mr au?**

**E Guggemusig gründe, dasch d'Idee vo lhne gsi
So isch sie entstande, die Aescher Rasselbandi**

**Wär hätt das dänkt, jä wirklich, anno dozumol
Bringe mrs ächt ahne? Und wird das ächt toll?**

**Die Zwiefel sind ummesunscht und schnäll besittigt
Interessierti Jungi gfunde, ohni Inserat in dr Zittig**

**Sicher, s'ganze isch no chliner gsi und chli gwagglig
aber Spass hets brocht, vo Afang a und das gwalstig**

**Wär spielt Pauke? Wär Schlagzüg? Und wär Posune
Jede het sie Plätzli gfunde, und los gohts mit gueter Luune**

**Vo Afang a wärde mr begleitet, mir müends Euch Sage
vo paar treue Seele, Fründe, die vom Waggiswaage**

**Bärefels-Waggis, die Beschte und das isch nid übertriebe
us Gleichsinnte Kollege worde, denn Fründe bis hüt bliibe**

**Reise an dr Vorfasnacht, jä dasch bi uns e grosse Teil
sind mol noch, immer witer gange, jä mir göhn steil**

**ganz zu Beginn au mol zu de Franzose... zu dene Weiche
do händs schiins agfange vo de Wäge abe seiche**

**Die ganz Schwiz hämmer scho fascht gseh und befahre
denn Dütschland bis uff Hamburg, s'Highlight s'wohre**

**wie überall sind d'Schlössli-Schränzer nid lang elei
schliesse Fründschafte, ob wit in dr Färni oder Dehei**

**Sicher isch nid alles rosarot gsi n zwei johrzähnte
aber us jedem Tief gits meischtens vorallem Guets z'ärnte**

**s'het au scho e Punkt gäh... wie gohts ächtsch witer?
uffgäh? nie im Läbe e Option, das wär jo schitter**

**Jede Einzelne, wo im Verein isch oder au scho nümme
het uns zu däm gmacht wo mr sind, und tuet uns no witer bringe**

**20 Jahr uff dr Gass, das isch wirklich chum z'realisiere
Mit viel Freud und Liedeschaft, zämme am feschte und musiziere**

**Und jetzt heisst gniesse, mitenand jubiliere und fiire
uff die näggschte 20 Jahr, ZÄMME NEUME AHNE, mir händ nüt z'verliere!**

Matti-Babbe-Fischi



9mol entweder oder mit... Patrik «Babbe Long» Nicolet

Zoggeli oder Schueh?

Zoggeli

Schnipo oder Hörnli mit Ghacktem?

Schnippo

Konfetti oder Röppli?

Röppli

Vorne im Car oder hinde im Car?

Haha dummi Frog, hindersti Reihe!
Alles andere isch für d'Füx

Harlekin oder Waggis?

Waggis :-)

„Wanderer“ oder „Elton“?

definitiv Wanderer (Kult)

Pub oder Schöppli-Bar?

Beides ;-)

Alka Seltzer oder Bier gege s'Chopfweh?

Alka Seltzer :-) aber was isch e Kater :-)

Kaffi Lutz oder Bier?

Bier

Mir wünsche Allne e schöni Fasnacht!

Leserbriefe, Inseratenbestellungen, Artikel,
Anregungen, Kritik, Lob etc. an:
info@schloessli-schraenezer.ch

Merci beschtens
Matti-Babbe-Fischi

www.schloessli-schraenezer.ch